

आकाशवाणी जयपुर-अजमेर  
प्रादेशिक समाचार  
दिनांक 19.10.2024 समय: 18.45 बजे

- उपराष्ट्रपति जगदीप धनखड़ कह्यो-देश मांय आला दर्जा री भणार्ई-लिखाई रा बेहतर मौकां रा बारा मांय विद्यार्थियां मांय जाग जगावण री जरूरत।
- प्रधानमंत्री नरेन्द्र मोदी रो आज नई दिल्ली मांय कर्मयोगी सप्ताह री सरूआत रो कार्यक्रम।
- राज्यपाल हरिभाऊ बागडे दिल री बीमारियां री सरूआती पिछाण अर रोकथाम सारू वातावरण बणावण माथे जोर दीनो।
- भाजपा री नेता विजया राहटकर, राष्ट्रीय महिला आयोग री अध्यक्ष बणायी ज्यी।

000

उपराष्ट्रपति जगदीप धनखड़ कह्यो है के भणार्ई-लिखाई ने कारोबार बणावण ऊं भणार्ई री गुणवत्ता माथे गलत असर पड़ रह्यो है। वे आज सीकर मांय एक गैर-सरकारी शिक्षण संस्थान री ओर ऊं राख्यी ज्या कार्यक्रम मांय बोल रह्या हा। उपराष्ट्रपति कह्यो के भणार्ई-लिखाई कदे ई आमदनी रो जरियो नी रही बल्कि त्याग, दान अर स्वस्थ समाज बणावण रो जरियो रही है। धनखड़ कह्यो के अनुसंधान अर नवाचारां रो सब ऊं बत्तो फायदो उद्योगां ने मिले है, जो दुनिया सामी देश ने ताकत देवे है। वे कह्यो के भारत मांय भणार्ई-लिखाई रा मोकळा मौका है अर संस्थानां अर उद्योग जगत ने वां ने ई बाबत् जाणकारी देवणी चाहिए। धनखड़ कह्यो के इण ऊं देश री प्रतिभा दूजा देशां मांय जावण अर विदेशी मुद्रा री हानि रुकेला।

0000

प्रधानमंत्री नरेन्द्र मोदी रो आज नई दिल्ली मांय कर्मयोगी सप्ताह री सरूआत करण रो कार्यक्रम है। सप्ताह रे दौरान मंत्रालयां अर न्यारा-न्यारा अहलकारां अर कर्मचारियां ने सिखावण दी जावेला। हर कर्मचारी ने कम ऊं कम 4 घंटा री सिखावण लेवणी जरूरी व्हेला। ई सप्ताह रा तैत नामी जाणकार आप-आप रा हलका ऊं जुड़ी जाणकारियां देवेला।

000

राज्यपाल हरिभाऊ बागडे दिल री बीमारियां ऊं बचाव अर वां रा ईलाज रा बारा मांय जाग जगावण माथे जोर दीनो है। राज्यपाल आज जयपुर मांय एक गैर-सरकारी अस्पताल री ओर ऊं राख्यी ज्या 'हार्ट कॉन्क्लेव' मांय बोल रह्या हा। राज्यपाल दिल री बीमारियां रा मरीजां री जान बचावण सारू लगातार काम करण बाबत् कह्यो। वे विश्व स्वास्थ्य संगठन री रपट री चर्चा करता थकां कह्यो के दुनिया मांय दिल री बीमारियां रे कारण व्हेवण वाळी करीब पौने दो करोड़ मौतां मांय ऊं पांचवों हिस्सो भारत रो है। राज्यपाल दिल री बीमारियां रे कारण मोटी तादाद मांय नौजवानां री मौतां माथे चिंता जताता थकां ई बारा मांय सरूआती जांच बाबत् समाज मांय जाग जगावण माथे जोर दीनो।

000

राज्य रा सात विधानसभा हलकां मांय व्हेवण वाळा उप चुनाव सारू आज दौसा विधानसभा हलका मांय एक उम्मीदवार पर्चा दाखिल कीनो। उम्मीदवार 25 अक्टूबर ताई पर्चा दाखिल कर सके है। ई बीचे झुंझुनूं विधानसभा हलका मांय राजस्थान राज्य भारत स्काउट गाइड री ओर ऊं स्काउट कार्यालय ऊं चूना चौक, रानी सती रोड व्हेती थकी मतदाता जागरूकता रैली निकाली ज्यी। रैली ऊं पैली राख्यी ज्यी संगोष्ठी मांय बिना डर्यां वोट देवण री अपील करीजी।

000

काल मोड़ी रात दुबई ऊं जयपुर आ रही उड़ान मांय बम व्हेवण री सूचना देवण री ई—मेल मिली। ई पाछे हिफाजत रा करड़ा इंतजामात बीचे जयपुर हवाई अड्डा माथे जहाज ने उतार र जांच करीजी, पण जांच मांय शंका जोगो कोई सामान नी मिल्यो। जहाज मांय 189 मुसाफिर हा। जयपुर पुलिस मामलो दर्ज कर र ई बारा मांय ई—मेल भेजण वाळा री ठा करण री कोशिश कर रही है।

000

भारतीय जनता पार्टी री नेता विजया राहटकर ने राष्ट्रीय महिला आयोग री अध्यक्ष बणायी है। महिला आर बाल विकास मंत्रालय ई बाबत अधिसूचना जारी कर दीनी है। राहटकर इण ऊं पैली महाराष्ट्र महिला आयोग री अध्यक्ष अर औरंगाबाद री महापौर रह चुकी है। वे भारतीय जनता पार्टी री राष्ट्रीय सचिव अर पार्टी री महिला शाखा री अध्यक्ष रा तौर ऊं ई काम कीनी है। मंत्रालय राष्ट्रीय महिला आयोग री सदस्य रा तौर ऊं डॉ. अर्चना मजूमदार री नियुक्ति री अधिसूचना ई जारी कीनी है।

000

सीनियर सैकण्डरी लेवल री समान पात्रता परीक्षा 2024, 22 ऊं 24 अक्टूबर तांई करायी जावेला। जयपुर शहर रा डोढ़ सौ केंद्रां माथे दो पारियां मांय व्हेवण वाळी आ परीक्षा देवण सारु 3 लाख 11 हजार ऊं बत्ता परीक्षार्थी नाम मंडाया है। जिला कलेक्टर डॉ. जितेन्द्र कुमार सोनी बतायो के परीक्षा सारु कन्ट्रोल रूम बणायी ज्यो है। ई परीक्षा सारु टोंक मांय ई 25 सेंटर बणायी ज्या है।

000

सीमा सुरक्षा बल—बीएसएफ मांय नुवा भर्ती व्हा आरक्षकां री आज जोधपुर मांय दीक्षान्त परेड राख्यी ज्यी। इण मांय 5 सौ 67 नव—आरक्षक शिरकत कीनी। ई दौरान वां ने देश रा संविधान रा प्रति कर्तव्यनिष्ठा, देश रा ऐका अर अखंडता बणायी राखण री सौगंध दिरायी ज्यी। सहायक प्रशिक्षण केन्द्र, सीमा सुरक्षा बल, जोधपुर रा महानिरीक्षक एम.एल. गर्ग परेड रो निरीक्षण कीनी अर सलामी लीनी।

000

एसओजी, राजस्व अधिकारी ग्रेड— द्वितीय अर अधिशासी अधिकारी वर्ग— प्ट प्रतियोगी परीक्षा—2022 रा पेपर लीक मामला मांय नागौर जिला मांय कुचेरा थाना हलका रा खजवाना ऊं 5 जणां ने पकड़्या है। एसओजी रा अतिरिक्त महानिदेशक वी.के. सिंह ई इम्तिहान मांय ब्लूटूथ रे जरिये नकल री शंका जतायी है। वे बतायो के मामला मांय 15 पिछाणी ज्या अर 8 अणजाण लोगां समेत न्यारा—न्यारा आरोपितां रे खिलाफ मामलों दर्ज करी ज्यो है।

0000

भ्रष्टाचार निरोधक ब्यूरो कानी ऊं राजकॉम्प इन्फों सर्विस लि० रा महाप्रबंधक छत्रपाल सिंह रे खिलाफ आमदनी ऊं बत्ती सम्पत्ति राखण रा मामला मांय आज जयपुर अर हनुमानगढ समेत दस ठोडां तलाशी लीरीजी। ब्यूरो रा महानिदेशक डॉ. रवि प्रकाश मेहरड़ा आ जाणकारी दीनी। वे बतायो के आरोपित अहलकार कने जयपुर मांय दो फ्लैट, एक मकान अर पांच कारां समेत मोटी तादाद मांय माल असबाब व्हेवण री ठा पड़ी है।

0000

9वां आयुर्वेद दिवस रा सिलसिला मांय जयपुर रा राष्ट्रीय आयुर्वेद संस्थान रा पंचकर्म विभाग री ओर ऊं मुफ्त रक्तमोक्षण शिविर लगायो जा रह्यो है। पंचकर्म विभाग रा विभागाध्यक्ष प्रो. गोपेश मंगल बतायो के सिंयाळा मांय शरीर मांय पित्त बध जावण ऊं रक्त दृष्टि, अम्लपित्त सरीखी परेशानियां बध जावे है। वे बतायो के पित्त बध जावण रे कारण व्हेवण वाळी बीमारियां ऊं बचाव री जाणकारी देवण अर ईलाज सारु 18 अक्टूबर ऊं 15 नवम्बर तांई रक्तमोक्षण शिविर लगायो जा रह्यो है। रक्तमोक्षण पंचकर्म ईलाज मांय घणो खास मान्यो जावे है। इण रो मकसद चमड़ी ऊं जुड़ी बीमारियां, दाद, फोड़ा—फुंसी, एक्जिमा, खुजली, सरीखी बीमारियां आगी करणो है।

000

अलवर मांय डिप्लीरिया रा मामला सामी आयां पाछे प्रशासन सावचेत व्हे ग्यो है। आरसीएच रा निदेशक डॉ. सुनीत सिंह राणावत जिला अस्पताल पूग र जरुरी व्यवस्थावां रो जायजो लीनी। डॉ. राणावत कह्यो के डिप्लीरिया ऊं बचाव सारु ज्यां बच्चां रे टीका नी लगायी ज्या है वां रे टीका लगावण सारु खास अभियान चलायो जावेला।

000

भारतीय गेहूं अर जौ अनुसंधान संस्थान, करनाल केंद्र सरकार कानी ऊं मंजूर करी ज्यी गेहूं री 13 नुवी भांत रा बीज बांटणो आज सरू कर दीनो। ई सारू देशभर ऊं 22 हजार किसान पोर्टल माथे नाम मंडाया हा। नुवी भांत रा आं बीजां मांय बीमारियां ऊं लड़बा रो अर बत्ती उपज लेवण रो बूतो है।

000

काल अखंड सुहाग रो पर्व करवा चौथ मणायो जावेला। ई सिलसिला मांय महिलावां मांय खास उमाव निजर आ रहयो है। बाड़मेर जिला मांय करवा चौथ री पैली वाळी सांझ महिलावां हाथां मांय मेहन्दी रचा रही है। करवा चौथ रे मौके खरीददारी सारू आज बाजारां मांय खास चहल-पहल निजर आयी।

000

राजस्थान ग्रामीण आजीविका विकास परिषद्-राजीविका री ओर ऊं जयपुर मांय 21 अक्टूबर ऊं दीपावली मेळो लगायो जावेला। सात दिन चालण वाळा ई मेळा मांय प्रदेश रा 70 ऊं 80 खुद सेवक समूहां रा सदस्य वां रा सामान रो दरसाव करेला। राजीविका री अतिरिक्त मुख्य सचिव श्रेया गुहा बतायो के मेळा मांय ब्लू पोटरी, कोटा डोरिया, लाख की चूड़ियां, आचार, नमकीन, बाजरा ऊं बणी चीजां, सांगानेरी प्रिंट रा कपड़ा अर राजस्थानी जूतियां माथे सगळां रो ध्यान रेहवेला।

000

आस वाळी महिलावां री मुफ्त सोनोग्राफी सारू चलायी जा रही मां वाउचर योजना रा तैत बालोतरा जिला मांय 342 महिलावां ने वाउचर जारी करी ज्या है। ई योजना रा तैत आस वाळी लुगाइयां री दूजी या तीजी तिमाही मांय मुफ्त सोनोग्राफी कराई जावे है। जिला मांय ई योजना ऊं हाल ताई 13 गैर-सरकारी सोनोग्राफी केंद्र जोड़ी ज्या है।

0000

चिकित्सा अर स्वास्थ्य विभाग री ओर ऊं चलाया जा रह्या टोबैको फ्री यूथ कैम्पेन 2.0 रा तैत आज पाली मांय "चलो पहनाएं पाली को धूम्रपान मुक्ति का ताज" अर राजस्थानी साफा माथे तम्बाकू निषेध रा लोगो सागे बैनर रो विमोचन करी ज्यो। ई मौके राजकीय बांगड़ स्नात्कोत्तर महाविद्यालय मांय नशा मुक्ति अभियान रा तैत कार्यशाला राख्यी ज्यी अर विद्यार्थियां मांय नशो नी करण बाबत जाग जगायी ज्यी।

000

प्रधानमंत्री नरेन्द्र मोदी आकाशवाणी ऊं 27 अक्टूबर दीतवार ने प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई रेडियो कार्यक्रम री 115 वीं कड़ी व्हेला। आप ई महीना री 25 तारीख ताई मुफ्त नम्बर 1 8 0 0 - 1 1 - 7 8 0 0 माथे राय भेज सको हो। ई सागे ई 1922 नम्बर माथे मिस्ड कॉल दे र एस. एम.एस. माथे मिल्या लिंक माथे ई राय दी जा सके है। नरेंद्र मोदी एप अर माई जीओवी ओपन फोरम रे जरिये ई राय दी जा सके है।

0000